



100 Joor Sans Gène
Fyyr und Flamme
Källerabstiig
19. November 2022

Dief unde n im Gärbergässli

Am 19. Novämber isch dr «Groosbasler Källerabstiig vom innere Ring» gsi. Übrigens: Zem innere Ring ghöre n allii Glyggekäller, wo innerhalb vo dr alte Schtadtmuur liège. In unserem Jubeljoor hämmer ebbis Schpeziellers welle gschtalte, ass me gseet, ass es für is e ganz schpeziells Joor isch. Drumm hämmer e Konzäbtt - unter em Motto «mit Fyyr und Flamme fyre mer s 100-Joor-Sans-Gène-Geburtsdaagsfeschtli» - usgschafft.



Zem daas Ganze z bewäarbe hämmer e n eimoolige Flyer gmacht, woo daas Ganze scho n e Weeneli bekannt macht, ass es villycht ebbis Schpeziellers git. Daas Joor, rächt passend ze dämm Geburtsdaag, hämmer dr ganz Käller mit Ballöön, Gírlande, Glitzervorhäng und noo viilem mee deggoriert. E bsunders Highlight isch die groossi Sans-Gène-Blache mit em Jubel-Logo druff gsi, wo perfägg an die leeri Källervand basst hett. E

wytere Bliggfang isch e groosses goldigs 100 uss Ballöön gsi.

E bsunders Joor - e bsunderi Deggorazion

Die viili Deggorazion hett e groossartig Flair im Käller gää und jede woo verby koo isch, hett grad gmergt, ass by n is daas Joor ebbis bsunders isch. As zuesätzligs Züggerli hämmer au no unseri Karte mit e baar Schöttli vo Berliner-Luft und Jäägermeischer erwyteret. Die Erwyterig vom Sortimänt isch by de meischte Gescht seer guet aakoo und hett sich au guet verkauft. Zem



Ässe hett s unseri tradizionelle Hörnli mit Ghaggtem und Frikadelle noo Sans-Gène-Rezäbtt gää. Zem Dessert hämmer e n Usswaal vo sälbergmachte Geburtsdaagskieche kaa.

Berliner-Luft-Schöttli as Geburtsdaagsgshänggli

Natürlig hämmer au e gleins Geburtsdaagsgshänggli für unseri Gescht kaa. Soo hett jede, wo dr Wääg ze n is in Käller gfunde heet, zem Schtart gratis e «Berliner-Luft-Schöttli» bekoo. Zem Wool! Natürlig hämmer dää Källerabstiig nit elai kenne maischtere n und hänn im Vooruss bym Organisiere, wie au wäärend em Oobe sälber, tatkräftigi Unterschtützig vo zaalryche Hälfer kaa, wommer is seer wänn bedange derfür! Es hett



is seer gfreut im guet bsuechte Käller au zaalrychi Glyggemittglieder vo allne Seggzione dörffe n aaztraffe n und z bewirte. Am Zwai de Morge n isch denn aber au langsam Schluss gsi und die letschte Gescht sinn bätte worde, sich au uff e Heiwäg z mache. So isch e richtig glungene n Oobe au wiider schnäll verby gange.
Moritz und Tobi

